

Inkêritu sobri Igualdadi na Saúdi di Komunidadi 2026: Temas prinsipal

Di baxu bu ta atxa temas prinsipal, ku mas informason na kada tópiku. Uza es temas na material informativu, rede sosiais, riunions i konbersu ku membrus di komunidadi. Skodji ou adáta temas ki ta txiga midjor na bu komunidadi.

Kada dia, na Massachusetts, sta tomadu disizon sobri nesesidadis, prioridadis, solusons i rekursus pa komunidadi. Bu speriénsia ten ki djuda orienta kes disizon.

- Abo é kel algen ki midjor sabi kuzê ki ta poi komunidadi mas saudável. Ora ki bu respondi inkêritu, bu ta partilha bu valoris, nesesidadis i speransa pa futuro.
- Bazadu na speriénsias di membrus di komunidadi, dadus rekolhidu na inkêritu ta ba djuda organizasons lokal difendi polítikas mas justu, konsigi finansiamentu pa respondi nesesidadi lokal i adáta programas pa sirbi midjor ses komunidadis. Na nivel di stadu, kes dadus ta permiti konprende nesesidadis sosial i di saúdi spesífiku di kada komunidadi, identifika oportunidadi pa diminui desigualdadi i defini prioridadi na distribuison di rekursus.

Inkêritu sobri Igualdadi na Saúdi di Komunidadi ta da voz a grupus ki txeu bes ka ten stadu ben representadu, sima na dadus sobri ses saúdi i bem-estar. Ora ki bu respondi inkêritu, bu ta kontribui ku bu speriénsia i konhesimentu, i ta garanti ma bu komunidadi ta fika representadu.

Nu sta ta enfrenta novu tipu di ameasas pa saúdi i seguransa di komunidadis ki, pa txeu tenpu, ka teve mesmu oportunidadi di ten bon saúdi. Agora, mas ki nunka, dadus sentradu na igualdadi, sima kes di CHEI, é fundamental.

- Massachusetts sta trabadja pa garanti ma komunidadis ki antes ka ta parseba na dadus ou ka tenha voz na disizons podi participa, spesialmenti na kontestu atual.
- É importanti rekolhi speriénsias i konprende impaktu di polítikas i medidas atual na komunidadis mas vulnerável.

CHEI ta rekonhesi realidadi undi nu ta vive i trabadja, sima preokupasons i medus ki algen ta enfrenta tudu dia.

- Partisipason na Inkêritu sobri Igualdadi na Saúdi di Komunidadi é voluntáriu i totalmenti anónimu. Inkêritu ka ta pidi ninhun informason pesoal pa identifika-u, (sima nomi, númeru di telefóni ou email). Bu pode salta kalker pergunta si bu ka krê respondi.
- Tudu resposta i dadus rekolhidu é anónimu. Dadus ki ta partilhadu ta ser apresentadu djuntu ku resposta di otus partisipantis (tudu djuntu).